

Muhyiddin Saksi MoU Untuk TSM Golf Challenge 2013
Bernama
17 Sept, 2013

SHAH ALAM, 17 Sept (Bernama) -- Timbalan Perdana Menteri Tan Sri Muhyiddin Yassin hari ini menyaksikan majlis menandatangani perjanjian penajaan bagi kejohanan TSM (Tan Sri Muhyiddin) Golf Challenge 2013 yang akan berlangsung dari 5 hingga 8 Dis depan.

TSM Golf Challenge merupakan kejohanan golf yang diasaskan Muhyiddin sendiri melalui Tan Sri Muhyiddin Charity Golf (TSMCG) sejak tahun 2006.

Pengerusi Jawatankuasa TSM Golf Challenge Datuk Haris Ismail berkata perjanjian penajaan itu membabitkan kerjasama antara TSMGC, Proton Holdings Berhad, Persatuan Golf Malaysia (MGA) dan Asian Tour International Ltd.

Beliau berkata dokumen perjanjian ditandatangani Presiden TSMCG Tan Sri Megat Najmuddin Megat Khas, Pengerusi Proton Holdings Berhad Tan Sri Mohd Khamil Jamil, Presiden MGA Tan Sri Mohd Anwar Mohd Nor dan wakil Asian Tour International, Irfan Hamid.

Menteri Belia dan Sukan Khairy Jamaluddin turut menyaksikan perjanjian itu dan menyumbangkan cek bernilai RM200,000 daripada kementeriannya.

Proton merupakan penaja utama manakala Glenmarie Golf and Country Club menyediakan tempat bagi kejohanan itu sejak tiga tahun lepas.

Haris berkata perjanjian itu yang membabitkan MGA serta Asian Tour International Ltd akan melayakkan pemenang secara automatik ke dalam beberapa kejohanan golf profesional Jelajah Asia termasuk Kejohanan Golf Terbuka Malaysia dan Kejohanan Golf Terbuka Iskandar.

Pemenang kejohanan ini juga akan dihantar untuk menyertai kejohanan golf amatur di Indonesia dan Thailand, katanya.

Haris berkata TSM Golf Challenge 2013 merupakan kejohanan golf amatur terbesar di Malaysia yang bakal menampilkan pemain golf remaja terbaik di dalam negara dan pada tahun ini, kejohanan ini akan menjadi lebih berprestij apabila terdapat penyertaan juara golf remaja dari negara Asean.

"Ini akan memberikan platform yang amat baik untuk pemain remaja kita bersaing dengan pemain terbaik di rantau ini dengan merebut hadiah berjumlah RM500,000," katanya.

TSM Charity Golf merupakan badan amal yang banyak memberikan sumbangan kepada rakyat Malaysia yang memerlukan sejak 11 tahun lepas dan dinaungi sendiri oleh Perdana Menteri Datuk Seri Najib Tun Razak.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=978342>

